



Selina Müller prelegia il text da la sborgna i'l Piertan da la Grotta da cultura a Sent. Ella es a la fin la victura da la saira e survain il prüm premi – üna butiglia licör dad iva.

FOTO DAVID TRUTTMANN

Ün «viva» sülla poesia viva

I nun es stat il prüm poetry slam rumantsch, ma probabel la prüma «battosta poetica» in territori ladin. L'Uniun dals Grischs ha invidà in sonda saira illa Grotta da cultura a Sent al prüm da quatter poetry slams ch'ella organisescha durant quist on. A Sent han las trais auturas e l'autur survigni ün applaus frenetic per lur performanzas.

DAVID TRUTTMANN/FMR

Che as poja tuot far per rumantsch? As riva p.ex. da «slamar» eir in lingua rumantscha? Voul dir: vaja a peformar texts poetics in ün poetry slam eir in net e s-chet ladin? – La resposta han dat in sonda saira a Sent trais auturas giuvnas, ün autur giuven, üna moderatura e l'Uniun dals Grischs(UdG) chi nu less – tenor l'ultima radunanza generala dals 1. avrigl – plü esser tant «grisch». Ed eir las passa 60 aspettaturas ed aspettatur ha guidà a dar la resposta in connex cul poetry slam a Sent: Bain cler chi va a far ün poetry slam!

Per üna butiglia da licör

Las reglas dal poetry slam (per rumantsch: battosta poetica) sun svelte statts etablidas da l'autura e moderatura *Romana Ganzoni* da Schlargna. Ella ha surtut in sonda saira il «super-job» da manar tras la saira e da far d'arbitra. Ed ella ha eir portà – cun giacca da chürom, schocca rösa e s-charpas d'argient – ün pa glamour i'l Piertan da la Grotta da cultura. Las reglas apunta: peformar ils texts in lunghezza maximala da ses minuts, il public dà il güdicat cun seis applaus, da guadagnar daja a la fin üna butiglia da vinars – illa versiun da l'UdG üna butiglia licör dad iva. Davo il test obligat cun l'applaus esa lura i liber.

Sül palc han prelet – o illa lingua dal poetry slam plüost «performà» – duos auturas puteras, ün'autura ed ün autur vallader: *Hannah Flury* da Zuoz, *Nadja Hort* da Turich, *Janic Maskos* da Scuol e *Selina Müller* da Martina. Minchün/a ha prelet duos texts.

Da sborgnas e libertats

Il prüm text da la «battosta poetica» es lura fingià stat per uschedir üna prognosa chi chi pudes guadagnà il licör. Selina Müller ha nempe quintà dad üna sborgna. In möd virtuos ha ella stort ils peds per descriver co cha l'alcohol till'ha stort il stomi. La performanza da la giuvna gimnasiasta engiadinaisa ha muossa cun che ingredienzas cha'l poetry slam lavura: cun üna prelecziun viva, cun rimas internas, cun gös da peds, cun interagir cul public.

Da quellas ingredienzas ha eir dat perdütta Janic Maskos cun seis text «Eu po eir». In quel ha el lodà e schmaladi al listess mumaint las

«Tuot es i fich bain – buns texts, bun'atmosfera e sala plaina. Eu m'allegri fingià süllas prosas ediziuns.»

Gianna Duschletta, capo-organisatura

libertats poeticas – güsta eir in connex cun ün poetry slam. Janic Maskos ha fat siglir las ricchezas linguisticas rumantschas sco scha quai füss la plü normala roba dal muond, fond qua e là eir allusiu al canon da la litteratura rumantscha.

Da rizzas e giats

Tuns plü tranquils sun lura stats d'udir i'ls texts da las duos auturas puteras Hannah Flury e Nadja Hort. La prüma ha descrit in seis duos texts duos bes-chas: las giattas e las rizzas. I'l prüm text ha ella esprimi il giavüsch da pudair esser sco üna giatta, s'imaginond la vita da quella. I'l seguond text ha ella quintà da las rizzas chi giodan durant la not ils plaschairs in üert, durant ch'ingün nu tillas vezza.

Nadja Hort es üna «slammadra» regulara da Turich chi discuorra però eir puter. Ella ha rendü omagi a l'amur chi fa ün strich tras la vita d'üna persuna chi vaiva «vairamaing tuot oters plans». In ses seguond text ha Nadja Hort perfin tut per mans üna tematica amo plü delicata, nempe quella d'uffants chi vegnan in scuola cun üna «buscha» plaina da pissers tanter mobbing e malatias. E güsta quist'autura ha

muossa fuormalmaing ün'otra ingredienza dals poetry slams, nempe da repeter sco ün refrain da chanzun singulas passaschas, da lavurar cun ritem, tun, variaziun e structura clera.

La finischiun han fat ils duos matadors locals in Engiadina Bassa, Janic Maskos e Selina Müller. Tuots duos han trattà üna tematica chi dà rumpatesta a lur generaziun – la superficialità illa comunicaziun ed illa relaziun digital-sociala, ingio cha la singula persuna as sainta suletta e brama l'inscunter real, per dar dal pled ün cun tschel.

La prüma da quatter «battostas»

Il poetry slam a Sent ha organisà la nouva supranza da l'UdG chi ha gnü be d'incuort sia radunanza. La capo-organisatura da quist arrandschamaint es statta *Gianna Duschletta* chi s'ha muossada a la fin da la saira fich satisfatta invers la FMR: «Tuot es i fich bain – buns texts, bun'atmosfera e sala plaina. Eu m'allegri fingià süllas prosas ediziuns.» L'UdG prevezza nempe d'organisar quist on amo trais da quels poetry slams in Engiadina, sco a Sent cun auturs invidats dals organisaturs obain eir cun poets e poetessas voluntarias.

Eir schi'd es gnü dit a Sent chi's tratta dal prüm poetry slam rumantsch, nun es quai dal tuot il cas. Fingià in plüssas occasiuns han poets e poetessas rumantschas performà texts in simila fuorma da concorrenza, tanter oter eir als Dis da litteratura a Domat dal 2015 durant üna gronda sairada da poetry slam.

Applaus frenetic

Premiera rumantscha o brich – pac importa. Mincha text ha survigni in sonda saira a Sent ün applaus frenetic. E quel es gnü d'ün public eir plü giuven chi nun es uschigliö per forza preschaint a mincha prelecziun litterara rumantscha.

A la fin ha üna runda finala d'applaus stuvü eruir chenün/a slammader/dra chi va cullas urbajas – o meglter dit culla butiglia. La cuorsa ha fat Selina Müller, fors eir pervi da seis text da la sborgna chi'd ha stort ils peds ed il stomi. In quel sen: «viva» – ed a la prosma!

Ils prossems poetry slams da l'UdG sun als 16 da gün, als 22 da settember ed als 24 da november 2023. Detagls davart lös ed uraris sün www.udg.ch.

PLAZZA AVIATICA SAMEDAN

Cumischiun administrativa es cumpletta

La conferenza da la Piazza aviatica Samedan ho elet a trais novs commembers per sia cumischiun administrativa.

Da nov faun part da la la conferenza da la Piazza aviatica Samedan *Tina Boesch*, anteriura directura da la destinaziun turistica d'Engiadin'Ota, *Mario Cavigelli*, anteriur cusglie governativ e *Stefan Metzger*, depüto dal Grand cussagl. La cumischiun as constituescha sves. Il presidi vain perque decis a la prossma tschantada, scrivan ils responsabels in lur comunicaziun. Daspö l'an 2022 maina *Gian Peter Niggli* il gremi ad interim.

Credit supplementer per proget

Düraunt ils ultims mais haun ils responsabels surlavuro il proget da sanaziun da la piazza aviatica. La grupa da lavur propona cul nov proget da realisar quel in etappas. Que sainza serrer la piazza aviatica. Il proget actual prevezza cuosts da var 35 milliuns francs. L'import es sur ils 22 milliuns francs cha la populaziun da las ünedsch vschinaunchas da l'Engiadin'Ota vaiva decis cun la votaziun a l'urna l'an 2017. Perque daro que üa votaziun per ün credit supplementer.

Dumandas aviertas pretendan dapü temp

La missiva per quella votaziun vess stuvieu gnir preschanteda l'eivna passada a la conferenza da la piazza aviatica. Causa dumandas aviertas davart la finanziaziun tres la Confederaziun e'l chantun, nu saja quel böt però auncha raggiunt. Impü es la piazza aviatica auncha in trattativas cun la Rega, chi evaluescha ün lö per üna basa dadoura la piazza aviatica. Tenor Gian Peter Niggli es il böt da pudair preschainter l'utuon da quist an la missiva per la votaziun pel credit supplementer. (rtr/fmr)



La cumischiun administrativa da la Piazza aviatica Samedan es cumpletta.

FOTO MAD

IMPLANTS DA SPORTS VAL MÜSTAIR SA

Capriolas da l'ora sun stadas malas pels affars

A regard la stagiun d'inviern passada tira il territori da skis Minschuns ün bilantsch difficil. Sco cha'ls Implants da Sports Val Müstair SA scrivan in üna comunicaziun, fan els a regard las finanzas quint da scriver üna nolla naira. Ma cun la cifra dals giasts nu sun els insomma na cuntaints: in congual cun la stagiun d'inviern passada s'ha quella nempe diminuida per var ün quart. Eir la scuola da skis ha gnü var 17% damain lecziuns da skis. Ils responsabels vezzan il motiv principal i'l clima extraordinari ingon cun la mancanza da naiv. (cdm/fmr)

SCUOL

La scuola Rudolf Steiner cumpra localitats

La scuola libra «Rudolf Steiner» a Scuol es a partir dals 1. d'avrigl 2023 possessura da las localitats da scuola in Engiadina Bassa. Fin uossa d'eiran els fittadins da la scola a Scuol, uossa han els cumprà l'edifizi per var ün mez milliun francs. Els han pudü cumprà quel edifiziu da la Fundaziun Edith Maryon da Basilea. La finanziaziun es grattiada grazia ad üna acziun da crowdfunding e cun agens mezs finanzials. A la scuola Rudolf Steiner a Scuol van actualmaing var 20 scolaras e scolaras da l'Engiadina Bassa. La scuola exista daspö 23 ons a Scuol. (rtr/fmr)



Daspö ils 1. d'avrigl 2023 es la scuola libra «Rudolf Steiner» a Scuol possessura da l'edifiziu.

FOTO MAD